

奏奉 硃批學務大臣知道欽此

署兩廣總督岑等會奏籌設兩廣遊學預備科造就高等師範摺

竊維興學育才爲今日自強之要政朝野上下盡人皆知然而 朝旨敦促亦已數年興學之效仍未大著何也此其故固非一端而大端則以無師範故目前所需用者尙止初高等小學之教習學科程度並不高深物色教習已甚難得三五年後中學徧設物色高等師範自必更難奏定章程原令各省設立優級師範學堂惟此時無合格之學生仍從初級師範辦起必待八九年後始有畢業學生可用固屬緩不濟急而求優級師範之師範則難而又難臣等再三商酌擬於廣東省城設一遊學預備科考選中學已有根柢及普通學略經研究之學生一百八十人在內地預備兩年精選百二十人派赴日本直入彼之高等師範學校本科留學查該學校本科係分四部除第一部注重言文非我所急無庸派人肄習外其第二部以地理歷史爲主第三部以數學理化爲主第四部以動植礦物生理等爲主皆我今日學堂中重要之學科擬每部派學生一班肄習日本高等師範學校東京廣島各有一所我派往之學生如一校不能容可分入兩校惟受業時必以與日本學生同班爲最要現已由臣春煊特委專員赴日稟承駐日使臣楊樞與日本文部商訂辦法預備科應用課程

及教習並由派往之員與日本文部分別議訂延聘總期兩年之後即可直入彼之高等師範學校本科合計預備兩年本科畢業三年五年後即有高等師範可用優級師範學堂學科大致仿照日本高等師範學校編定惟經學諸子學爲我有而彼無羣經諸子國粹所在誠不宜轉使闕略但此乃我固有之學日後補習或於暑假內補習亦不甚難此項派往師範學生姑以百二十人計每年學費約需五萬金現經臣春煊等與臣經羲電商將來畢業選派出洋時何省學生即由何省籌費惟此時臣等雖意見相同會商定議所慮者學生出洋尙在兩年之後彼時設有異議此舉即廢於半途合無仰懇 天恩飭下總理學務處立案將來兩廣無論如何爲難此舉不得中輟庶於兩廣學務有所裨益謹 奏奉 硃批學務大臣知道欽此

陝甘總督崧奏甘肅文武學堂籌辦就緒酌擬章程請 飭部立案摺

竊於光緒二十八年二月先就省城書院改課策論算學一面籌款於省城南門外機器局傍擇地修造學堂委員赴南洋考察學舍課程規模延聘西學教習添購時務書籍暨應用各種儀器創辦大概情形業經奏明在案嗣據文武學堂提調即補知府楊增新詳稱文高等學堂自二十八年十月初一日開工起至二十九年八月底工竣計修造講堂齋舍客廳